



AMERIKADAGI VATANDOSHLARDAN PREZIDENTIMIZGA MAKTUB: YANGI O‘ZBEKISTON TARAQQIYOTIGA O‘Z MUNOSIB HISSAMIZNI QO‘SHAMIZ

Vatanimiz Mustaqilligining 35 yilligi arafasida O‘zbekiston Respublikasi Prezidenti Shavkat Mirziyoyev nomiga AQSH va Kanadada yashayotgan vatandoshlarimizdan maktub keldi.

Davlatimiz rahbariga yo‘llangan ushbu murojaat “Vatan Global Alliance” jamiyati raisi Ozod Soliyev, O‘zbekiston xalq artistlari Ezro Malakov va Muhabbat Shamayeva, Filadelfiyadagi “Vatan” jamiyati raisi Sadullo Ahmedov, Nyu-Yorkdagi “Vatan” jamiyati raisi Baxtiyor Qodirov hamda Amerikada yashab turgan 500 nafar vatandoshimiz tomonidan imzolangan. Quyida murojaat matni to‘liq holda havola etiladi.

“Muhtaram Shavkat Miromonovich!

Biz, Amerika Qo‘shma Shtatlari va Kanadada yashayotgan vatandoshlarimiz, Sizga chuqur hurmat va samimiy minnatdorligimizni izhor etib, ushbu Murojaatni yo‘llamoqdamiz.

Yaqinda Filadelfiya va Nyu-York shaharlarida “MILLAT SHAVKATI” kitobining taqdimot marosimlari bo‘lib o‘tdi. Ushbu tadbirlar biz uchun okean ortida yashab, qalban Vatan bilan hamnafas bo‘lgan vatandoshlarni bir maqsad va bir tuyg‘u atrofida jamlagan muhim ma‘naviy voqeaga aylandi.

“MILLAT SHAVKATI” kitobida tasvirlangan Yangi O‘zbekistonda so‘nggi yillarda amalga oshirilayotgan ulkan o‘zgarishlar, xalq farovonligi va mamlakat taraqqiyoti yo‘lidagi keng ko‘lamli islohotlar, shuningdek, O‘zbekistonning xalqaro maydonda tobora yuksalib borayotgan nufuzi haqidagi fikrlar vatandoshlarimizda katta qiziqish va mamnuniyat uyg‘otdi.

Taqdimotlar davomida bildirilgan samimiy fikrlar, Vatanimizda kechayotgan

o‘zgarishlarga bo‘lgan yuksak qiziqish va vatandoshlarimiz qalbidagi faxr tuyg‘usi bizga yana bir haqiqatni ko‘rsatdi: okeanlar va minglab chaqirim masofalar bizni Vatandan ajrata olmaydi. Qayerda yashamaylik, barchamizni birlashtirib turadigan yagona va aziz Vatan — O‘zbekistondir!

Muhtaram Prezident!

Sizning rahbarligingizda bugun mamlakatimiz o‘z so‘zi, qat‘iy pozitsiyasi, ochiq siyosati va aniq taraqqiyot maqsadlariga ega bo‘lgan davlat sifatida jahon hamjamiyatida munosib o‘rin egallab bormoqda. Biz, xorijda yashayotgan vatandoshlar, bu o‘zgarishlarni, ayniqsa, yaqqol his qilmoqdamiz.

Bir vaqlar chet ellarda, xususan, Amerika Qo‘shma Shtatlari va Kanadada istiqomat qilayotgan vatandoshlar uchun Vatanga borish, o‘z yaqinlari bilan diyorlashish, O‘zbekiston bilan erkin va yaqin munosabat o‘rnatish turli qiyinchiliklar bilan bog‘liq edi.

Bugun esa vaziyat tubdan o‘zgardi. Siz boshlab bergan ochiqlik va xalqparvarlik

siyosati tufayli xorijdagi vatandoshlarga bo‘lgan munosabat yangi bosqichga ko‘tarildi. Ular bilan muloqot qilish, ularni eshitish, Vatan bilan aloqalarini mustahkamlash va ularning bilim, tajriba hamda imkoniyatlarini O‘zbekiston taraqqiyotiga jalb etish davlat siyosatining muhim yo‘nalishlaridan biriga aylandi.

Ayniqsa, so‘nggi yillarda O‘zbekiston va Amerika Qo‘shma Shtatlari o‘rtasidagi munosabatlarning yangi bosqichga ko‘tarilayotgani bizga alohida g‘urur va mamnuniyat bag‘ishlamoqda.

Sizning AQSH Prezidenti Donald Tramp bilan olib borayotgan bevosita va ishonchli muloqotingiz, oliy darajadagi uchrashuv va telefon suhbatlari, shuningdek, AQSH hukumati, Kongressi va ishbilarmon doiralari bilan kengayib borayotgan hamkorlik O‘zbekistonga nisbatan Amerikadagi e‘tiborning tobora oshishiga xizmat qilmoqda.

Bugun ikki davlat o‘rtasida siyosiy muloqot, savdo-iqtisodiy va investitsiyaviy hamkorlik, ta‘lim, madaniyat va boshqa sohalarda yangi imkoniyatlar ochilayotganini ko‘rib turibmiz.

Muhtaram Prezident!

Siz olib borayotgan siyosat bizga nafaqat yangi imkoniyatlar yaratmoqda, balki zimmamizga katta mas‘uliyat ham yuklamoqda.

Biz xorijda yashab, O‘zbekistondagi jarayonlarni faqat kuzatib turuvchi insonlar

bo‘lib qolmasligimiz kerak. Biz hozir yashab turgan mamlakatlarda O‘zbekistonning munosib vakillari bo‘lishimiz, Vatanimizning haqiqiy qiyofasini keng jamoatchilikka yetkazishimiz, uning manfaatlarini qo‘llab-quvvatlashimiz hamda O‘zbekiston bilan dunyo mamlakatlari o‘rtasida yangi do‘stlik va hamkorlik ko‘priklarini qurishimiz zarur.

“Vatan Global Alliance” jamiyati Amerika Qo‘shma Shtatlari va Kanadada yashayotgan vatandoshlarimizni birlashtirish, ularning intellektual, iqtisodiy va ijtimoiy salohiyatini umumiy egzu maqsadlar atrofida jipslashtirish hamda O‘zbekiston bilan aloqalarini yanada mustahkamlash yo‘lida faoliyat olib bormoqda.

Biz AQSH Kongressi a‘zolari, jumladan, kongressmenlar Brayan Fitzpatrik, Brendon Boyle, shuningdek, shtat va shaharlar darajasidagi davlat va jamoat arboblari, gubernatorlar va merlar idoralari, ishbilarmon doiralari hamda turli millat va jamoalar vakillari bilan aloqalarni kengaytirishga harakat qilmoqdamiz.

Biz Amerika, Kanada va boshqa davlatlarda O‘zbekiston haqida yanada ko‘proq gapirishini istaymiz.

O‘zbekistonning boy tarixi va madaniyatini, xalqimizning qadriyatlarini, bugungi taraqqiyoti va ulkan iqtisodiy imkoniyatlarini dunyo jamoatchiligiga yanada kengroq tanitishni istaymiz.

Biz amerikalik tadbirkor va investirlarni O‘zbekistonga jalb qilish, yangi

texnologiyalar, bilim va tajribalarni Vatanimizga olib borish, ta‘lim va madaniy aloqalarni kuchaytirish, ayniqsa, xorijda ulg‘ayayotgan yosh avlodni ona Vatan bilan mustahkam bog‘lashni o‘zimizning muhim vazifalarimizdan deb bilamiz.

Muhtaram Shavkat Miromonovich!

“MILLAT SHAVKATI” kitobining Amerikadagi taqdimotlari yana bir muhim haqiqatni namoyon qildi: bugun Yangi O‘zbekistonda amalga oshirilayotgan o‘zgarishlar va erishilayotgan yutuqlar okean ortida yashayotgan yuz minglab vatandoshlarimiz qalbidagi ham aks sado bermoqda.

Vatanning obro‘si — bizning obro‘yimiz. O‘zbekistonning yutug‘i — bizning yutug‘imiz.

O‘zbekiston bayrog‘ining dunyo maydonida baland ko‘tarilishi — har bir vatandoshimiz uchun faxr va iftixordir.

Shu sababli ushbu murojaat orqali Sizga nafaqat minnatdorligimizni bildirmoqchimiz, balki bir muhim fikrni ham yetkazmoqchimiz: Biz Vatanimiz bilan birgami.

Biz qo‘limizdan kelguncha Yangi O‘zbekiston taraqqiyotiga o‘z munosib hissamizni qo‘shamiz.

Biz O‘zbekimiston va Amerika Qo‘shma Shtatlari o‘rtasidagi do‘stlik va hamkorlik munosabatlarini yanada mustahkamlashga xizmat qilishga tayyormiz.

Biz o‘z bilimimiz, tajribamiz, imkoniyatlarimiz, aloqalarimiz va

salohiyatimizni O‘zbekistonimiz ravnaqi va xalqimiz farovonligi yo‘lida safarbar etamiz.

Sizning Yangi O‘zbekistonni yanada kuchli, farovon, ochiq va dunyoda munosib o‘rin egallagan davlatga aylantirish yo‘lidagi sa‘y-harakatlarigizni yuksak qadrlaymiz va qo‘llab-quvvatlaymiz.

Sizga mustahkam sog‘liq, kuch-g‘ayrat, oilaviy xotirjamlik hamda xalqimiz va Vatanimiz ravnaqi yo‘lidagi mas‘uliyatli faoliyatingizda ulkan muvaffaqiyatlar tilaymiz.

Muhtaram Shavkat Miromonovich!

Shu fursatdan foydalaniib, Sizni va Siz orqali butun O‘zbekiston xalqini Vatanimiz mustaqilligining 35 yilligi bilan chin qalbimizdan muborakbod etamiz. Mustaqillik — xalqimizning eng ulug‘ ne‘mati, milliy g‘ururimiz va kelajagimiz poydevoridir. Bugun Yangi O‘zbekistonning jahon maydonida tobora yuksalib borayotgan obro‘-e‘tibori, xalqimiz hayotidagi ulkan o‘zgarishlar va ertangi kunga bo‘lgan ishonch mustaqilligimizning naqadar buyuk qadriyat ekanini yana bir bor namoyon etmoqda. 35 yillik qutlug‘ sana barcha yurtdoshlarimizga, shu jumladan, dunyoning turli burchaklarida yashayotgan vatandoshlarimizga muborak bo‘lsin!

Vatanimiz tinch, xalqimiz farovon, mustaqilligimiz abadiy va O‘zbekistonimizning dunyodagi mavqei yanada yuksak bo‘lsin”.

O‘Z

Yagona Vatan, yagona xalq bo‘lib, yangi hayot va kelajak yaratamiz!

BUYUK O‘ZGARISHLAR DAVRI: FAXR VA SHUKRONALIK

Jonajon Vatanimiz o‘z mustaqilligining 35 yilligini ulkan muvaffaqiyat va zalvorli ijobiy natijalar bilan kutib olmoqda. 1991-yilda O‘zbekiston mustaqil davlat sifatida g‘oyat murakkab, ammo shunchalar mukarram yo‘lini belgilab oldi. Mustaqillikning har bir yili qadrli, har bir kuni istiqlolni mustahkamlash yo‘lida olg‘a tashlangan bir qadam bo‘ldi. Tetapoya bo‘layotgan murg‘ak, navnihol davlatning qad ko‘tarish davridagi qiyinchiliklari har bir shakllanayotgan davlatga xos. Davlatimiz va xalqimiz milliy tiklanish davrini mardonavor bosib o‘tdi.



Bugun erishilgan natijalarni kechagi mehnatdan ayro holda tasavvur etib bo‘lmaydi. Dastlabki davrda mustaqil davlatimizning huquqiy asoslari yaratildi, boshqa bir davrda ularni amaliyotga tatbiq etishga e‘tibor qaratildi. Keyin esa

hayotning o‘zi yangi vazifalarni oldimizga qo‘ydi. Davlat va jamiyat rivojlangani sari kechagi ehtiyojlar o‘rniga yangilari paydo bo‘ldi.

Bu ishlarning har biri o‘z davri uchun muhim edi. 2017-yil davlatimiz

va jamiyatimiz yana bir yangi davrga qadam qo‘ydi. Bu davr yangi O‘zbekiston davri sifatida tarixga muhurlandi.

Davomi 3-betda



Yuksalish pallas

YANGI PEDAGOGIK TAFAKKUR UFQLARI

Chirchiq davlat pedagogika universiteti rektori, O‘zbekiston fan arbobi, professor G‘ofurjon MUHAMEDOV bilan “Yangi O‘zbekiston” va “Pravda Vostoka” gazetalari bosh muharriri Salim DONIYOROV suhbat

Yangi O‘zbekistonda kechayotgan shiddatli islohotlar, ilm-fan va texnologiyalarning jadal rivojlanishi har bir sohada raqobatbardosh, zamonaviy bilim va ko‘nikmaga ega kadrlarga ehtiyojni tobora oshirmoqda. Ayniqsa, ta‘lim tizimi uchun yetuk mutaxassislarni tayyorlash masalasi mamlakatning ertangi taraqqiyotini belgilaydigan strategik vazifalardan biri sifatida namoyon bo‘lyapti. Chunonchi, pedagogika yo‘nalishida yo‘l qo‘yilgan zarracha xato ham taraqqiyotda yillab ortda qolishga olib kelishi mumkin.



Bu jarayonda o‘qituvchining bilim-donligi, dunyoqarashi, kasbiy mahorati va yangilikka intilishi hal qiluvchi ahamiyat kasb etadi, albatta. Shunday ekan, ayni paytda maktabga, universitetlarga kelayotgan pedagog kadrlarning bilimi, va salohiyatini yanada oshirish zarurati, buning uchun oliy o‘quv yurtlari qanday

faoliyat yuritishi kerakligi soha mas‘ullari qatori ko‘pchilikni o‘ylantiradi. Chirchiq davlat pedagogika universiteti rektori, O‘zbekiston fan arbobi, professor G‘ofurjon MUHAMEDOV bilan suhbatimizda asosan shu masalalar doirasida fikr almashdik.

Davomi 5-betda

Jeenbek KULUBAYEV: “BIZ BUNDAN KEYIN HAM O‘ZBEKISTON BILAN BIR YO‘LDAN BORAMIZ”

Qirg‘iziston tashqi ishlar vaziri Jeenbek Kulubayev O‘zbekiston mustaqilligining 35 yilligi arafasida “Dunyo” AAgA intervyu berib, O‘zbekiston xalqiga samimiy tabrik va egzu tilaklarini yo‘lladi.

— O‘zbekiston davlat mustaqilligining 35 yilligini keng nishonlamoqda. O‘tgan davr davomida mamlakat ulkan taraqqiyot va o‘zgarishlar yo‘lini bosib o‘tdi. Sizningcha, mamlakatning qaysi islohotlari muhim ahamiyat kasb etdi?

— Avvalo, qirg‘iz xalqi va shaxsan o‘z nomimdan o‘zbekistonlik barcha qardoshlarni qutlug‘ shodiyoona bilan chin qalbindan tabriklayman. Joriy yil nafaqat O‘zbekiston, balki yubiley sanalarini nishonlayotgan mintaqamizning barcha davlatlari uchun ham muhim davr hisoblanadi.

Taraqqiyotning 35 yili davomida O‘zbekiston shakllanish va o‘zgarishlarning yorqin yo‘lini bosib o‘tdi. Eng muhim yutuq sifatida men Markaziy Osiyoda tinchlik, barqarorlik va yaxshi qo‘shnichilik munosabatlarining mustahkamlanganini qayd etgan bo‘lardim.

Shavkat Mirziyoyev rahbarligida O‘zbekiston mintaqaviy hamkorlikning zamonaviy modelini shakllantirishda asosiy me‘morlardan biriga

aylandi. Qo‘shni davlatlar bilan munosabatlar yaxshi qo‘shnichilik, sheriklik va birgalikda taraqqiy etishning sifat jihatidan yangi bosqichga ko‘tarildi.

Ayniqsa, so‘nggi yillarda mamlakatlarimiz o‘rtasidagi davlat chegarasi masalalari hal etilganini alohida ta‘kidlamoqchiman. Bu masalalar ko‘p yillar davomida murakkab mintaqaviy muammo bo‘lib kelgan.

Davomi 2-betda

KICHIK IMKONIYATLARDAN barqaror energetik qudrat sari

Bir paytlar elektr energiyasi haqida gap ketganda, asosiy mezon quvvat edi: qancha ko‘p ishlab chiqarilsa, shuncha yaxshi. Bugun esa masala ancha murakkab. Energiya qayerdan olinayotgani, uning tannarxi, barqarorligi, ekologik ta‘sir, iste‘molchiga qay darajada yaqinligi va eng muhimi, mamlakatning o‘z tabiiy imkoniyatlaridan qanchalik samarali foydalanayotgani ham katta ahamiyat kasb etmoqda. Qayta tiklanuvchi energiya manbalari shuning uchun ham endi shunchaki “yashil” texnologiya emas, balki iqtisodiy mustaqillik, resurslardan oqilona foydalanish va kelajak energetikasining muhim qismiga aylanmoqda.

Davomi 4-betda

